

## REGLUR

### um sérfræðileyfi tannlækna.

#### 1. gr.

Tannlæknar geta fengið sérfræðileyfi í eftirtöldum greinum tannlækninga að uppfylltum þeim skilyrðum sem fram koma í reglum þessum:

1. Barnatannlækningum
2. Bitlækningum
3. Munn- og kjálkaskurðlækningum
4. Sýklafræði
5. Tannfyllingu og tannsjúkdómalækningum
6. Tannholdslækningum
7. Tannholslækningum
8. Tann- og munn-gervalækningum
9. Tannréttingum

Ráðherra getur að fengnum tillögum nefndar samkvæmt 5. gr. laga nr. 38 frá 1985 fjölgað greinum eða felld niður.

#### 2. gr.

Nefnd skipuð skv. 5. gr. laga nr. 38/1985 um tannlækningar fjallar um reglur um nám sérfræðinga og umsóknir um sérfræðileyfi á sviði tannlækninga. Skipa skal varamenn í nefndina á þann hátt að í stað deildarforseta komi varadeildarforseti og heilbrigðisráðuneyti og Tannlæknafélag Íslands tilnefni hvort fyrir sig hina tvo.

Nefndin skal kveðja til tvo sérfróða menn til þátttöku í meðferð einstakra mála er varða viðkomandi sérgrein og fá þeir þá atkvæðisrétt í nefndinni.

#### 3. gr.

Til þess að tannlæknir geti átt rétt á að öðlast sérfræðileyfi, og kalla sig sérfræðing, skal hann sanna fyrir sérfræðinefnd að hann uppfylli þau skilyrði, sem talin eru í reglum þessum.

#### 4. gr.

Umsókn um sérfræðileyfi skal stíla til heilbrigðis- og tryggingamálaráðuneytis, en senda sérfræðinefnd.

Nefndin skal skila ráðuneytinu álit á umsókn innan þriggja mánaða frá viðtöku hennar.

Meirihluti nefndarmanna þarf að vera meðmæltur umsókn, til þess að nefndin geti mælt með henni og þar af a. m. k. annar hinna sérfróðu manna, sem kvaddir voru til skv. 2. gr.

Hljóti umsókn ekki tilskilin meðmæli, skal nefndin gera skriflega grein fyrir niðurstöðu sinni og senda ráðuneytinu ásamt umsókninni.

Forsendur nefndarinnar skulu jafnframt kynntar umsækjanda skriflega.

## 5. gr.

- I. Umsækjandi skal hafa tannlækningaleyfi hér á landi. Hann skal hafa stundað almennar tannlækningar um eins árs skeið hið minnsta áður en sérnám hefst. Sérfræðinefnd getur veitt undanþágu frá þessu ákvæði enda verði því fullnægt áður en sérfræðileyfi er veitt.
- II.
  - a) Eigi skal unnt að ljúka sérnámi á skemmri tíma en 3 árum.
  - b) Umsækjandi um sérfræðileyfi skal hafa stundað sérnám við viðurkennda menntastofnun og skal hafa lokið námi og uppfyllt þær kröfur, sem gerðar eru á hverjum tíma við viðkomandi stofnun. Að öllu jöfnu skal ekki tekið til greina minna en 1 ár á hverjum stað.  
Ef námið spannar einungis tvö ár, skal umsækjandi hafa dvalið eitt ár til viðbótar við nám/störf í sérgrein sinni við sömu eða aðrar viðurkenndar menntastofnanir eða hjá viðurkenndum sérfræðingi í greininni, en þó ekki skemur en 3 mánuði á hverjum stað.
  - c) Umsækjanda ber að leggja fram vottorð eða önnur skilríki frá yfirmönnum viðkomandi stofnana um að öllum fyrrnefndum kröfum hafi verið fullnægt.
- III. Að sérfræðinámi loknu skal umsækjandi, áður en hann sækir um sérfræðileyfi, hafa unnið í sérgrein sinni í 2 ár a. m. k.
- IV. Umsækjandi skal leggja fram ritgerð um efni, er snertir sérgrein hans. Ritgerðin skal byggð á eigin rannsóknargögnum og þarf að sýna getu umsækjanda til að nýta sérfræðirit og þekkingu hans á vísindalegri aðferðafræði.
- V. Umsækjanda um sérfræðileyfi í klíniskri grein ber að leggja fram minnst 10 sjúkraskrár úr eigin starfi, er sýni sem fjölbreyttasta þekkingu á lausn klínískra vandamála, í þeim sérgreinum þar sem því verður við komið. Sjúkraskrár skulu studdar öllum þeim gögnum er best geta hjálpað til við mat, greiningu og meðferð viðkomandi sjúkdóms.
- VI. Umsækjandi í paraklíniskri grein skal leggja fram ritgerðir, tvær eða fleiri, sem birst hafa í viðurkenndu sérfræðiriti.
- VII. Veita má einum og sama tannlækni sérfræðileyfi í tveimur greinum tannlæknisfræði að uppfylltum skilyrðum 5. gr. í hvorri fræðigrein fyrir sig.

## 6. gr.

Reglur þessar sem settar eru af sérfræðinefnd samkvæmt 5. gr. laga nr. 38/1985 um tannlækningar staðfestast hér með skv. 5. gr. sömu laga til þess að öðlast gildi þegar í stað. Jafnframt falla úr gildi reglur með sama heiti nr. 46 frá 2. mars 1965.

**Ákvæði til bráðabirgða.**

Peir tannlæknar, sem fullnægt hafa ákvæðum 5. gr. lið I, II og III fyrir gildistöku reglna þessara skulu fram til 1. október 1988 undanþegnir ákvæði 5. gr. lið IV og V. Undanþága samkvæmt 5. gr. lið V gildir þó ekki um tannréttingar.

Tannlæknir sem hafið hefur sérfræðinámi í tannréttingum fyrir gildistöku reglna þessara er heimilt að haga námi samkvæmt eldri reglum nr. 46 frá 1965 til 1. október 1990. Skal sérstaklega tekið fram í umsókn sé slíkrar heimildar óskað.

*Heilbrigðis- og tryggingamálaráðuneytið, 17. september 1986.*

**Ragnhildur Helgadóttir.**

*Ingimar Sigurðsson.*